



O'ZBEKISTON RESPUBLIKASI
ADLIYA VAZIRLIGIDA
DAVLAT RO'YXATIDAN O'TKAZILDI
RO'YXAT RAQAMI: 2693-13
2025 - yil 21 - Aprel

O'ZBEKISTON RESPUBLIKASI MARKAZIY BANKI BOSHQARUVINING QARORI

Tijorat banklari kapitalining monandligiga qo'yiladigan talablar to'g'risidagi nizomga o'zgartirish va qo'shimchalar kiritish haqida

O'zbekiston Respublikasining "O'zbekiston Respublikasining Markaziy banki to'g'risida"gi va "Banklar va bank faoliyati to'g'risida"gi qonunlariga muvofiq O'zbekiston Respublikasi Markaziy banki boshqaruvi **qaror qiladi:**

1. O'zbekiston Respublikasi Markaziy banki boshqaruvining 2015-yil 13-iyundagi 14/3-son qarori (ro'yxat raqami 2693, 2015-yil 6-iyul) (O'zbekiston Respublikasi qonun hujjatlari to'plami, 2015-yil., 27-son, 360-modda) bilan tasdiqlangan Tijorat banklari kapitalining monandligiga qo'yiladigan talablar to'g'risidagi nizomga ilovaga muvofiq o'zgartirish va qo'shimchalar kiritilsin.

2. Mazkur qaror rasmiy e'lon qilingan kundan e'tiboran bir oydan keyin kuchga kiradi.

O'zbekiston
Respublikasi Markaziy
banki Raisi
01-Aprel 2025-yil
7/6 son



ISHMETOV TIMUR
AMINDJANOVICH

O‘zbekiston
Respublikasi Markaziy
banki boshqaruvining
2025-yil 1-apreldagi
7/6-son qaroriga
Ilova

**Tijorat banklari kapitalining monandligiga qo‘yiladigan talablar
to‘g‘risidagi nizomga kiritilayotgan o‘zgartirish va qo‘shimchalar**

1. 9-band quyidagi tahrirda bayon etilsin:

“9. I darajali kapital regulyativ kapitalning 50 foizidan kam bo‘lmasligi lozim. II darajali kapital miqdori I darajali kapital miqdorining 100 foizidan oshib ketsa, oshgan summa regulyativ kapital tarkibiga kiritilmaydi.”.

2. 12-band quyidagi tahrirda bayon etilsin:

“12. I darajali qo‘shimcha kapital o‘z ichiga quyidagilarni oladi:

a) mazkur Nizom 12-1-bandida belgilangan talablarga javob beruvchi to‘liq to‘langan nokumulyativ muddatsiz imtiyozli aksiyalar va (yoki) boshqa nokumulyativ muddatsiz kapital vositalari;

b) qo‘shilgan kapital – nokumulyativ muddatsiz imtiyozli aksiyalar va (yoki) boshqa nokumulyativ muddatsiz kapital vositalarini birinchi marta joylashtirilishida ularning nominal narxidan yuqori to‘langan summa;

d) I darajali qo‘shimcha kapitalga qo‘shilish shartlariga javob beruvchi shu‘ba korxonalarini tomonidan chiqarilgan va uchinchi shaxslar ixtiyorida bo‘lgan kapitalga tenglashtirilgan vositalar, shuningdek mazkur Nizomning 11-bandi “g” kichik bandiga kiritilmagan ozchilik ulush egalarining bank yig‘ma balansiga birlashadigan korxonalaridagi ulushlari.”.

3. Quyidagi mazmundagi 12-1-band bilan to‘ldirilsin:

“12-1. I darajali qo‘shimcha kapitalga kiritilgan to‘liq to‘langan nokumulyativ muddatsiz imtiyozli aksiyalar va (yoki) boshqa nokumulyativ muddatsiz kapital vositalari quyidagi shartlarni qanoatlantirishi lozim:

muayyan sotib olish sanasi yoki shartlariga ega bo'lmashligi;

bank tugatilganda ularga doir talablar bank depozitorlari, kreditorlari va subordinar qarzlarni bo'yicha talablari bajarilgandan so'ng qondirilishi;

emitent yoki unga aloqador shaxslar tomonidan kafolatlanmagan va ta'minlanmagan bo'lishi;

ular chiqarilgan sanadan kamida besh yildan so'ng emitent tashabbusi bilan qaytarib sotib olinishi mumkinligi, bunda Markaziy bankning e'tirozi mavjud bo'lmashligi, shuningdek o'xshash turdagi muddatsiz imtiyozli aksiyalar va (yoki) boshqa nokumulyativ muddatsiz kapital vositalariga yoxud boshqa ulardan yuqoriroq turiga almashtirilishi yoki qaytarib sotib olinishi natijasida bank I darajali kapitalining monandlik koeffitsiyenti mazkur Nizom talablariga muvofiq o'rnatilgan minimal talabdan kamida ikki foiz bandga yuqori bo'lishi;

bank aksiyadorlari umumiy yig'ilishi qaroriga muvofiq ularga doir dividendlar (foizlar) to'lanmasligi mumkinligi;

ular bo'yicha to'lanmagan yoki to'liq to'lanmagan dividendlar (foizlar) jamg'arib borilmasligi va keyinchalik to'lanmasligi;

ular bo'yicha dividendlar (foizlar) to'lanmaganligi bank tomonidan majburiyatlarning bajarilmasligi (to'lovga qobiliyatsizlik) holati deb baholanmasligi;

ular bo'yicha to'lanmagan dividendlar (foizlar) hisobidan shakllangan mablag'lardan bank hech qanday cheklovlarsiz foydalanish huquqiga egaligi;

ular bo'yicha dividendlar (foizlar) to'lanmasligi bank uchun hech qanday cheklovlarni keltirib chiqarmasligi;

ular bo'yicha dividendlar (foizlar) miqdorlari (stavkalari) bankning moliyaviy holati va (yoki) kredit reytingi o'zgarishi natijasida o'zgarmasligi;

bank ular qaytarib sotib olinishiga oid shartlarni shakllantirmasligi, shu jumladan shartnoma shartlariga bunday shartlarni kiritilmasligi;

bank to'lovga qobiliyatsizlikka uchraganini baholashda bankning majburiyatlari uning aktivlaridan ortib ketish holatiga olib kelmasligi;

buxgalteriya hisobi maqsadlarida majburiyat sifatida tasniflangan kapital vositalari bank I darajali asosiy kapitalining monandlik koeffitsiyentini kamida mazkur nizomga muvofiq talabdan (kapitalning konservatsiya buferi hisobga olinmagan holda) bir foiz bandga balandroq darajaga yetkazish maqsadida bankning oddiy aksiyalariga to'liq miqdorda yoki qisman konvertatsiya qilinishi va (yoki) hisobdan chiqarilishi;

bankni qayta kapitallashtirishga to'sqinlik qiluvchi shartlar, shu jumladan kelgusida ushbu kapital vositalari avvalgilariga nisbatan pastroq narxda chiqarilganda avval joylashtirilgan kapital vositalariga egalik qiluvchi shaxslarga kompensatsiya to'lanishini nazarda tutuvchi shartlarning mavjud emasligi.”.

4. 13-band o'z kuchini yo'qotgan deb topilsin.

5. 1-ilovada:

a) 10-2 va 10-3-pozitsiyalardagi “2024-yil 1-apreldan boshlab” degan so'zlar “2024-yil 1-apreldan boshlab 2025-yil 1-iyungacha qadar” degan so'zlar bilan almashtirilsin;

b) quyidagi mazmundagi 10-4 va 10-5-pozitsiyalar bilan to'ldirilsin:

“

10 ⁴ .	2025-yil 1-iyundan boshlab doimiy daromadga ega bo'lgan yoki kamida oxirgi uzluksiz olti oy davomida har oy bank hisobvarag'ida, shu jumladan bank kartasida mablag'lar aylanmasiga ega bo'lgan hamda qarz yuki ko'rsatkichi 50 foiz va undan past bo'lgan o'zini o'zi band qilgan shaxslarga ajratilgan 300 million so'm va undan kam miqdordagi kreditlar, bundan oilaviy tadbirkorlikni rivojlantirish dasturlari doirasida ajratilgan kreditlar mustasno. Bunda: doimiy daromadga ega bo'lgan yoki kamida oxirgi uzluksiz olti oy davomida har oy bank hisobvarag'ida, shu jumladan bank kartasida mablag'lar aylanmasiga ega bo'lgan hamda qarz yuki ko'rsatkichi 50 foiz va undan past bo'lgan o'zini o'zi band qilgan shaxslarga ajratilgan 300	75%
-------------------	--	-----

	<p>million soʻmdan oshadigan kreditlar yillik foiz stavkasidan kelib chiqib, Markaziy bank tomonidan oʻrnatiladigan tavakkalchilik darajalari asosida tavakkalchilikka tortiladi;</p> <p>oʻzini oʻzi band qilgan shaxslar doimiy daromadga ega boʻlmagan yoki kamida oxirgi uzluksiz olti oy davomida har oy bank hisobvaragʻida, shu jumladan bank kartasida mablagʻlar aylanmasiga ega boʻlmagan yoki qarz yuki koʻrsatkichi 50 foizdan oshgan boʻlsa yoxud mazkur koʻrsatkichni aniqlash imkoni boʻlmagan boʻlsa, mazkur qarz oluvchilarga ajratilgan kreditlar ushbu ilovaning 13-2-pozitsiyasiga muvofiq tavakkalchilikka tortiladi.</p>	
10 ⁵ .	<p>2025-yil 1-iyundan boshlab kichik tadbirkorlik subyektlariga ajratilgan jami qoldiq summasi bank regulyativ kapitalining 0,2 foizidan oshmagan, biroq eng koʻpi bilan 15 mlrd. soʻmgacha kreditlar, bundan oilaviy tadbirkorlikni rivojlantirish dasturlari doirasida ajratilgan kreditlar mustasno.</p> <p>Bunda, kichik tadbirkorlik subyektlariga ajratilgan jami qoldiq summasi bank regulyativ kapitalining 0,2 foizidan yoki 15 mlrd. soʻmdan oshgan kreditlar yillik foiz stavkasidan kelib chiqib, Markaziy bank tomonidan oʻrnatiladigan tavakkalchilik darajalari asosida tavakkalchilikka tortiladi.</p>	75%

”.